

DISPUTATIO MEDICA
IN A U G U R A L I S,
D E

PARALYSI,

Q U A M,

FAVENTE DEO TER OPT. MAX.

Ex Auctoritate Magnifici D. Rectoris,

JOHANNIS MUNNICKS, M.D.

Reip. Ultrajectinae Poliatri, atque in Inclyta ejusdem
Academia Medicinæ Anatomæ & Botanices
Professoris Ordinarii,

NEC NON

Amplissimi Senatus Academici consensu, & Nobilissima

Facultatis M E D I C A E Decreto,

PRO GRADU DOCTORATUS,

Summisque in MEDICINA honoribus, & privilegiis,
ritè ac legitimè consequendis,

Publico Examini subicit

ARNOLDUS BOOT BEIRMAN, Westfrisius,

A. D. 12 Martii, horis locoque solitis.



TRAJECTI ad RHENUM,

Ex Officinâ FRANCISCI HALMA, Academiæ
Typographi, clc lcc xcv.

Reverendo, Pietate & Doctrina conspicuo Viro,
D. MARCO BEIRMAN, Verbi Divini in
Ecclesia, quæ Christo colligitur in Wognum,
Præconi vigilantissimo, Oraculorum Divinorum
Interpreti disertissimo, Parenti ad extremum vitæ
halitum filiali amore diligendo, obsequendo.

Clarissimis Spectatissimisque Viris

D. JACOBO VALLAN, M. D. ejusdemque
Facultatis in celeberrima hac Academia Medicinæ
Praxeos & Institutionum Professori Ordinario,
Præctico famigeratissimo, felicissimo, de me &
meis studiis meritissimo, Promotori venerando,
nunquam non colendo, observando.

D. JOHANNI MUNNICKS, M. D. Reip.
Ultrajectinæ Poliastro, atque in alma hac Acade-
mia Medicinæ, Anatomes & Botanices Professori
Ordinario, ejusdemque h. t. Rectori Magnifico,
Præctico solertissimo, de studiis meis bene merito,
æstimando, amplectendo.

D. M. GERARDO de VRIES.

D. M. JOHANNI LUYTS, Philosoph. Do-
ctoribus, ejusdemque in hac Academia Professo-
ribus Ordinariis, subtilissimis, de studiis meis Phi-
losophicis optime meritis, adeoque à me æternum
honorandis, suspiciendis.

Hanc Disputationem Inauguralem in grati animi onus

D. D. D.

ARNOLDUS BOOT, *Auctor.*





Elut hominum sors, illi, quæ, omnium creaturarum, quas habet spatiosa mundi machina, est, quo ad corporis dispositionem & formam (ut sileam de horum anima rationali & immortali, qua præ illis præditi sunt) immensum quantum prævalet; quod ipsum non ob-

scure Naso innuere videtur, his verbis:

Pronaque cum spectent animalia cætera terram,
Os homini sublime dedit, cælumque tueri
Jussit, & erectos ad sydera tollere vultus.

Sic tamen illorum conditionem, illâ, quæ Adæ nepotum est magis fortunatam existere, eò quod perquam multis, imò multò pluribus calamitatum morborumque speciebus premuntur quam hæc, nullus unquam iverit inficias, quæ omnes enumerare, nec juvat, nec licet, atque etiam iis recensendis omnes arithmetico numeri vix sufficerent. Verùm mentis oculis in paralysin ejusque naturam conjectis, hanc in scenam proferre non piguit, quippe morbum speculatione haudquaquam vacuum, & commodam Thesibus efformandis materiem, in qua obiter, tam veterum, quam recentiorum circa nervos opinionem proponere, ut & quæstionem, an, integrò sensu, motus aboleri possit, ventilare; nec non vocis etymologiam, definitionem, differentias, similitudinem & dissimilitudinem quam cum aliis morbis habet, symptomata, causas & quasdam circa hæc meditationes, atque signa diagnostica & prognostica in medium proferre, & tandem curam generalem subnectere, animus est. Vale.

DISPUTATIO MEDICA

INAUGURALIS

DE

PARALYSI.



Erùm antequam ipsam rem aggrediar, non in-
consultum fore existimavi dicenda de nomi-
ne, in quantum in conscribenda hac disserta-
tiuncula ex usu erunt, proponere, non verò in
animum induxi in his nimius esse, sed levi
tantùm brachio percurrere, & nomenclaturæ
fini (quem esse putem ut una res ab alia di-
stingui & internosci possit) satisfacere, atque
insuper hic fieri debet, ut inanes arceantur logo-
machix, quod ut fiat, paucis vocis etymolo-
giam spectabo, cæteris missis, quæ forte de nomine dici possent, &
vulgò sub Logicorum considerationem veniunt, ut sunt ejus varia sy-
nonymia & homonymia, quæ rerum naturas speculantem parum tan-
gunt, adeoque illorum potius quam nostri existunt fori. Derivatur
itaque à Græca voce *παράλυω*, resolvo, relaxo (resolvi enim dicitur
nervus cum tonum amisit, quod hic fit) quod ex *παρά* & *λύω*, unde
παράλυσις, Latinè Paralysis, Belgicè *Beroertheyt*, *Lammighey*, dicitur.

§. II. Missa vocis consideratione, hujus affectus definitionem sub-
jungam, de qua varii varia; ego vero cum Celso, qui eam non in-
congruè nervi resolutionem dicit, quia ejus est obstructio, eandem re-
tineo. Sed cum de nervis hic sermo incidat, facere non possum, quin,
tam veterum, quam recentiorum circa hos discrepantiam, animadvertam.
Veteres ad Galenum usque, nervum, vel tendinem musculi, vel ossis liga-
mentum, pronunciaverunt, quod sufficienter probat Cl. Lindanus Me-
dicinæ Physiologicæ cap. xvj. artic. xvij. Atque ea de causa veterum
paralysis fuit nimia flacciditas, humiditas & relaxatio nervosarum par-
tium modo memoratarum, atque hoc ipsum malum nautis qui Indo-
rum rivos laudant frequens est, nec non interdum eos qui nidum ser-
vant miserandum in modum corripit, atque hoc natales suos scorbuto
debere creditur, illud vero apud Jacobum Bontium descriptum, & *Beri-*

berò

beri nomine (sic enim indigenis dicitur) indigitatum vide. Recentiores vero, quibuscum hac in parte facio, per nervum intelligunt tubulum aut canalem spiritibus vehendis dicatum (præter tunicas & fibrillas suas ac forte vasa sanguinea) non secus ac venæ & arteriæ sanguini recipiendo destinatæ sunt.

§ III. Distinguitur paralyſis ratione majoris affectionis gradus in perfectam & imperfectam: perfecta dicitur cum motus & sensus pereunt, imperfecta cum motus perit, manente sensu, vel cum sensus perit manente motu; cujus tamen speciei veritas non immerito suspecta videtur, & quidem hæc de causâ, quia ad motum major, ad sensum verò minor requiritur spirituum animalium copia: Etenim ad sensum tantum requiritur exterioris nervi tunicæ tubulosæ & fibrillarum internarum à spiritibus animalibus debita tensio, ut eo pacto ab objectis externis affectis, tum nervis sensorio communi imprimatur motus, quem huc delatum mens percipit, unde sensus fieri solet; hæc ergo tensio requirit modò æqualem neque vehementem spirituum animalium influxum: Ad motum autem absolvendum, non motus æqualis & qui in æquilibrio servat nervos & musculos, sed motus impetuosus & copiosus in nervi substantiam fibrosam & muscülorum fibras motrices influxus requiritur, quò factò fibræ nervæ & muscülorum à spiritibus animalibus plùs justò inflantur, hinc distenduntur, hinc abbreviantur, & musculi caput ad caudam accedere faciunt, unde tum ossibus, vel aliis partibus alligatis musculis implantati, ad sese rapiunt: in quo ipsissima motus natura consistit, adeoque ex dictis patet, quid de hac sententia sentiendum sit, & si alibi verum sit illud dictum, *quod potest majus, id etiam potest minus*, sanè hic esse autumem. Verum hujus sententiæ patroni (præeunte Galeno) cupientes vitare charybdim, in scyllam incidunt, dum ad duplicis generis nervos, sensorios, & motorios, confugiunt, quippe hi soli motui, illi soli sensui inservirent, verum, cum nec ratione, nec anatomix demonstratione fundata sit, hanc, priore pluris non facio, nec non illam, quæ hos illis molliores dicit. Atqui, si aliquid de sensoriiis & motoriiis dicendum sit, existimem, non nisi tantum ratione principii vel partium quibus inseruntur, discrepare, quod principium an sit à spinali medulla, an à cerebro, & à qua parte cerebri, non est hujus loci latius perquirere, cum ad anatomen pertineat, &, ista ergò ratione, si quis velit distinguere, sensorii dici possunt, qui in partes musculis carentes implantantur, ut hepatis, lieni, renibus &c. Motorii, qui in partes musculosas & motu evidenti gaudentes, inseruntur. Altera

differentia a parte affecta desumitur, diciturque universalis vel particularis; universalis dicitur paraplegia, ubi omnes sub capite nervi resolvuntur, capite integro, hemiplegia ubi alterutrius lateris nervi resolvuntur, diciturque (venia sit voci) semiuniversalis. Tertia differentia est aliarum partium affectarum, ut linguæ, œsophagi, brachii, cruris &c. auditque particularis, quibus omnibus pro varia parte affecta, varia ab autoribus imponuntur nomina, ad quas L. B. remittimus. Quartò ratione causarum distinguitur in sanguineam, pituitosam, serosam, & in eam, quæ est a causa externa vel interna. Quintò denique in idiopaticam, affectò primariò cerebrò, non tantum quo ad ejus substantiam medullarem seu fibrosam sed & principia nervorum ipsos spiritus animales, & sympaticam per consensum, seu alios morbos sequens, ut apoplexiam, epilepsiam & s. Cujus causam, animo obversantem, exactiori mentis trutinâ librare, animus fert.

§. IV. Verum id ut fiat, epilepsiæ naturam, in quantum hujus explicationi inservire poterit, contemplari liceat: Hæc itaque causam debet spiritibus animalibus acido-volatilibus, unde vehemens in paroxysmo motus nasci solet, quem tunc excipit quorundam cerebri vasorum ingens dilatatio (per vasa cerebri intelligo præcipuè quidem substantiam medullarem ejusque fibrillas, poros, spirituumque conceptacula & vias, sed etiam principium spinalis medullæ, ut & ipsa vasa sanguinea) unde fieri vix potest, quin aliorum cerebri vasorum compressio sequatur, quâ factâ compressione, aliis dilatatis, multò adhuc impetuosius in hæc dilatata feruntur, quia tum magis iis ad hæc, quam ad illa datur aditus: cum quia anima tunc in eos non facit determinationem, tum quia natura humorum est (nedum spirituum) ut, ubi minus impedimentum inveniunt, eò velocius & liberius illuc moveantur. Atque hæc sic præmissa viam sternunt ad faciliorem cognitionem, qua ratione epilepsia hunc affectum nonnunquam post sese trahat, sc. cum quædam vasa sic dilatata existunt & motu illo vehementi sp. animales ea ingrediantur, facile (nostro arbitrio) particulæ quædam crassiores una cum sp. animalibus ingredi possunt, quò motu epilepticò nonnihil sufflaminatò, spiritus, utpote tenuiores, viâ consuetâ abeunt; particulæ vero crassiores, vasis a prædicta tensione remittentibus, figurâ cum eorum poris non quadrantes & in iis tum remanentes, ea obstruunt; vel cum porro ad nervos motæ sunt, eos itidem obstruunt, oriturque vasorum nervorumve obstructio, hinc resolutio.

§. V. Cæterum cur apoplexiam hæc eadem sæpissime sequatur calamitas,

mitas, clarum est, quia cum sit subita & vehemens omnium vasorum cerebri obstructio, difficulter omnia sic rursus referari valent, ut ne quidem ulla remaneat, præsertim si sit pituitosa, ubi humores viscidum sunt, illi enim tardo gaudent motu, & firmiter sibi invicem adhærent aliisque partibus, atque hinc etiam non stante pede illinc deturbari posse, res ipsa loquitur.

§. VI. Similitudinem habet cum apoplexia magnam, nam, quod apoplexia in toto est, id est paralytis in parte, in apoplexia enim omnia, in paralyti quædam cerebri vasa sunt obstructa, estque in utroque affectu sublatus motus: in epilepsia & omnibus convulsionum speciebus auctus est motus, adeoque dissimilitudinem cum paralyti habent.

§. VII. Symptomata quibus ordinario stipatur hic morbus, sunt pallor, frigus, atrophia, extenuatio, ut & motus & sensus abolitio, vel solius motus, manente sensu, adeo ut non modo actio animalis, sed & naturalis lædatur, de quibus in seq. latius.

§. VIII. Causa paralyseos proxima est impeditus spirituum animalium in nervos & ad partes movendas influxus.

§. IX. Causæ remotæ sunt, quæcumque illam obstructionem (quæ fit per obturationem, angustationem vel compressionem) causare possunt, eaque variis fit in locis, seu in cerebro, seu in corporibus striatis, aut alibi circa caudices medullares, aut alibi in nervi principio medio vel fine, sc. in fibris nerveis aut membranaceis. Hasce ergo in internas & externas dispecimus: interna potissimum agnoscit colluviem seerosam, quæ modo has, modo illas particulas sibi habet admixtas. Quandoque etiam sanguis, ut in apoplexia, est causa, nonnunquam ipsorum sp. animalium vitium, nim. indebitum eorum robur, ut minuta quantitas, depravata qualitas, ut & motus degener, nec non nervorum vitium. Ad causas externas refer ligaturas, tubercula, omnes continui solutiones, ut sunt ulcera, vulnera, contusiones, fractiones a vi externa &c. Animi corporisque motus vehementiores, ut exercitia corporis diu protracta & graviora, ira indomita, terror ingens, usus opii, vinorum tartareorum, Mercurius, frigus, luxatio vertebrarum & si quæ sunt similia. Quas res memoratas jamjam sub incude revocare in animum induxi. Quod de torpedine vulgo narratur, mihi non valde perspectum videtur, & si non de ejus existentia, saltem de ejus viribus vehementer dubitem, quæ tantas esse perhibent, ut piscatoris manum antea sanam, mox paralyti inficiat, sc. emissionem veneni ad hamum & sic porro ad manum: ingentes profecto vires! quæ vel non habent quod cedant illis, salamandri, aut basilisci, ejusve ovis.

§. X.

§. X. Ut autem post varias causas consideratas earundem paulo pleniori enodationi inhærere ratum feci, ab ea quæ a colluvie serosa est incepturus. Colluvies ergo hæc serosa, seu ex errore in rebus non naturalibus, seu ex alia quavis causa contracta, copiosa in corpore & vasis existens, sp. vitales suffocat & involvit, hinc motus, tam fermentativus, quam progressivus, minuuntur, hinc non tantum sanguinis glandulis subcutaneis, renibus aliisque feri colatoriiis adfertur, neque etiam sufficienter illorum pori tenduntur & patulia sp. animalibus servantur, adeoque minus serosæ materiæ secernitur & amandatur quam debebat, & plus accedit, quam decedit, sicque hujus major ac major in corpore fit redundantia, quâ vasa implentur & distenduntur, & accedente tum frigore externo, quo magis constipantur glandulæ subcutaneæ, malum incrudescit; quâ sic existente sanguinis diathesi, plurimorum morborum fomes existit & prout variè variæ solidæ partes afficiuntur, varius oritur morbus: Atque sic jam nunc existentibus vasis turgidis & continuo magis accrescens serum impetum facit in cerebri substantiam corticalem quæ nihil aliud est quam congeries minutissimarum glandularum (uti constat) in quibus sp. sequestrantur, atque hinc ad tubulos & fibras medullares (quæ totidem sunt spirituum animalium conceptacula) demittitur, ubi vel manet, vel porro ad nervos descendit, sicque nervis aut tubulis impacta, partim poros mutat, partim spiritus animales, corpuscula, immensâ volatilitate prædita, motu sistit, hinc major ac major fieri solet obstructio, pororumque mutatio, quô accidit ut nervi tum ἀσθενεῖς & flaccidi concidant resolvanturque, & pro ut jam humor ille obstruens has vel illas particulas, ut terrestres, fixas, tenues, crassas, sibi junctas habet, symptomata variant, quorum omnium diversitatem ad amissim considerare, operis immensi, & cum brevitati studeam, ab instituto alienum foret, nim: quomodo, cum hæc particulæ admixtæ sunt, variant, & quô pacto rursus aliæ operentur. Sufficiat vero in genere hæc occasione hæc prælibasse.

§. XI. Quando sanguis est in causa dicitur sanguinea paralyfis, cum enim sanguis valde fermentatur & copiosus in vasis est, nullô negotiô aliquod vasculum sic premi & angustari potest, ut obstruatur & nihil amplius admittere queat, non alia ratione, ac fit in apoplexia sanguinea, & hoc pacto omnis sp. animalium aditus ad nervos intercluditur. Estque hic casus non adeo frequens, quam ille qui a colluvie serosa est, & vix in alios, quam plethoricos cadit.

§. XII. Quôd sp. vitium spectat, dicendum existimem, ad debitum

bitum motum perficiendum requiri debitam spirituum quantitatem & robur. Per robur intellige non modo debitam quantitatem sed & convenientem qualitatem (non enim debent esse nimis crassi, ponitici, austeri, vel aliis humoribus permixti, sed debent debitam habere volatilitatem ut & motum) si enim sp. animalium quantitas minuta sit glandulæ, in cerebro non satis servantur patulæ, quia materia (puta sp:) in iis sequestranda deficit, atque hinc facile aliquæ earum concidere possunt, unde Paralysis nascitur, & pro ut hæ vel illæ sic concidunt, variarum partium inducitur; si vero eorum qualitas sit depravata, ut cum sunt nimis crassi, pontici &c., tum perfluentes strictissimos nervorum poros, facile alicubi quidam eorum hærent, quia cum nervorum poris figurâ non conveniunt, qui stagnantes obstructionem, adeoque resolutionem causant. Requiritur quoque debitus eorum motus, Spiritus enim nimis volatiles nimium motum inferunt, & tum vasa varia comprimuntur & dilatantur de quo §. IV. vel si minore gaudeant motu, segnes sunt, & minus mobiles nimisque sanguini implicati manent, neque satis extricantur, & sic deficiente materiâ in glandulis cerebri sequestranda, illæ concidunt, ut modo innui. Possuntque sic cæteri humores in corpore existentes depravari, & tam longe ab esse naturali recedere, ut vim narcoticam, vitriolicam, salinam, acidam, aliamve similem induant: & quid multis? talem, quæcunque sp. animalibus infesta est, id est, quæ suffocat, dissipat, minus movet, figit, eorumque motum varie alterat & depravat, & sic dicto modo paralyfin efficit.

§. XIII. Causis itaque internis, earumque fiendi modô sic obiter notatis, ad externas delabimur & primo quidem ad ligaturas, quæ si strictè nimis cuidam membro injiciantur, conceptu non ardivum videtur ejus causam expisari: nervi namque si comprimantur & angustentur, valde, ut hic fit, pori clauduntur constringuntur, & mutantur, adeo ut spiritibus animalibus motus liber denegetur. Huc etiam refer, quod spiritus animales compressum nervum ob dictum obstaculum non pervadentes ad alias glandulas feruntur, hinc hæ, nervo obstructo correspondentes concidunt, & sic porro perficitur. Atque par tumorum durorum & scirrhorum tuberculorumque ratio.

§ XIV, Non etiam mirabile existit, quomodo solutio continui hujus affectus parens existere possit, ut abscissio nervi transversa, cum enim per affluentes spiritus animales moventur muscoli, utique non possunt jam moveri ab iis quia eo deferri nequeunt, huc refer omnia vulnera, ulcera, contusiones, fractiones a vi externa, luxationem vertebrarum

atque hinc in prognosi patebit quam difficilis, si non impossibilis, sint curæ, quia non facile consolidantur nervi, vel si consolidentur fieri vix potest quin pori mutantur, iisque mutatis, spiritibus animalibus via præcluditur.

§. XV. Quod ad animi motus vehementiores attinet, ut sunt ira & terror vehementes, dicendum maxime accelerare sanguinis & spirituum motum, atque hinc sequitur id quod §. x. docui. Quod opii usum & vinorum tartareorum spectat, id spirituum imminutam quantitatem, vel depravatam qualitatem respicit. Mercurius insinuando se in subtilissimos nervorum poros, eorum poros mutat & obstruit; frigus sanguinem reddit crassum inertem & compactum, & sic in eo non debite exaltantur sp., adeoque nec sufficientes segregantur, & sic ad spirituum minutam quantitatem refer., partim quia sic constringuntur vasa sanguinea & pori nervorum, ut ibi humores condensentur & illic locum occupent.

§. XVI. Cæterum ut symptomatum in antecessum memoratorum explicationi incumbam, a frigore exordior, quæ an privatio sit an ens verum ac positivum, æque ac calor, non cum philosophis (præsens namque hæc rerum facies prolixitatem vetat, neque etiam hujus est loci) contendam; contentus, si meis dictis veritatem adstruxero. Frigus itaque in corpore nostro nulli alii ortum debet quam motus tam intestini quam progressivi defectui vel absentiae, unde sequitur & calor, calor namque motus consequens esse creditur, atque omnem calorem sanguini & humoribus debite motis debemus. Verum roganti quomodo humorum motus calorem producere valeat, dictum sit: quod, considerato sanguine, ejusque partibus, seu potius particulis integrantibus, quæ sunt salinæ, spirituosæ, insipidæ, terrestres, oleosæ & ut Magni Hippocratis verba, mea faciam, sexcenta alia, quas omnes indefinitasque particulas varia constare figura certo certius est atque hinc necessario infertur aliqua remanere interstitia (figuræ enim quadrangulares cum sexangularibus, triangularibus &c. non sic uniri queunt, ut nullum interstitium remaneat) quo concessio daretur vacuum ni aliquid esset, quod ea impleret, atque id ipsum est materia ætherea, aliis particulæ igneæ dicta: sed cum in re sit consensus, de voce dissensus absit. Si ergo motus in corpore solitus fiat, nec vehemens accedat, materia illa ætherea, quæ perpetuo in motu est nec ullibi includitur, rursus egreditur, quomane solitario motu, particulas illas sic disponit ut poros idoneos sibi formet, quod liberius transfluere possit, & sic minus diu in sanguine remanet, atque quo magis id sit eo magis nasci solet frigus, & minor
sic

fit fermentatio, cujus maxima etiam illa causa est. Verum si sanguinis motus acceleretur, pori illi, seu interstitia mutantur, quibus mutatis materia illa ætherea eos perfluere nequit, & cum hæc nullibi includatur, ut modò dictum, poros sibi format, & sic diutius in sanguine remanet, sicque particulas sanguinis, ante unitas quadantenus & magis inter sese quadrantes, & propius ad invicem accedentes, mutat, à sese disjungit latius, & interstitia majora reddit, quò factò, majore etiam copiâ ad sanguinem fertur: Atque hinc calor.

§. XVII. Atque his ita præliminatis, facilè liquet, cur frigus in parte affecta sit, scilicet, quia motus progressivus in ea parte multùm cessat, unde & motus ibidem sanguinis fermentativus multùm cessat: motus progressivus, quia pori & tubuli, per quos sanguini transeundum est, concidunt, quia à spiritibus patuli non servantur, motus fermentativus, ob rationes § superiore dictas. Pallor etiam huc referri potest, nempe quia sanguis minora illa vascula & tubulos musculorum non intrat, ob spirituum influxus defectum, atque hinc non tingitur cutis à transparente sanguine, & tum color cuti naturalis, nim: albicans apparet: eâdem etiam de causâ, atrophia & extenuatio fiunt, quia succo nutritio non patent vascula, unde poris adhærere nequit.

§. XVIII. Visis explicatisque symptomatis, quæ sunt hic signa diagnostica, ad prognosin accedo, in qua ad duplicem corporis œconomiam attendi debet, videlicet ad animalem & naturalem, & pro varia earum læsione periculum æstimandum venit, etiam ratione causarum, causa enim externa, internâ, sanguinea, serosâ vel pituitosâ facilius curatur. Illa quæ a tuberculis & ligaturis fit, facilius curam admittit: quæ a solutionibus continui contingit, planè difficilioris, si non impossibilis existit curæ: quæ à transversa nervi est sectione pro immedicabili habetur: illi quæ à luxatione vertebrarum est medela fieri nequit: illa omnis quæ à spiritibus suffocatis aut minutis aut alio modo vitiatis accidit, nihil boni portendit, E. G. ab opio, vinis tartareis &c. Quod ad animi & corporis motus vehementiores, non determinaverimus, sed ratione labis inductæ periculum variat. Etiam omnes hæ causæ (paucis exceptis) variant ratione temperamenti, ætatis, durationis, temporis & s. adjunctorum.

§. XIX. Ne tamen natura vacillans huic oneri ferendo impar, succumbat penitus, illi manus auxiliares, quantum dabitur, præbeamus. Quod ut fiat videamus quid indicetur. Indicatur liber spirituum animalium in nervos influxus. Ut autem id fiat ad causam, an externam an

interna sit, sanguinea an pituitosa, an vero serosa & ad humorum conditionem attendatur, oportet.

§ XX. In hac ergo specie, quæ sanguinem parentem agnovit, ordinariò curam inchöat clyster acris, quæ revulsioni gratia injiciatur. Verum dicat quisquam quomodo videtur hoc medicamentum illud præstare posse? sed mirari desinet, si ejus operationis ritè sit persuasus. Injecti ergo clysmatis particulæ acres variè stimulant & vellicant intestinorum tunicas & nervos tam sensui quam motui peristaltico dicatos, unde major fit versus eos affluxus, & patulæ redduntur/quo melius in iis lymphæ intestinalis secerni queat, nec non particulæ quædam crassiores circa has vel in his existentes & idoneam vel saltem majorem excretionem prohibentes dividuntur ab invicem, & hinc impedimenta, congruam secessionem vetantia, removentur; quibus ita consideratis, patet fieri revulsionem, id est, majorem humorum huc affluxum, quia minus impedimenti hic inveniunt, & hinc fit quod non tam multum sanguinis adfertur cerebro, hinc vascula hæc turgida deplentur paululum, quare alia ante compressa nimis comprimuntur, daturque ansa melioris aditus ad glandulas parti affectæ respondentes.

§. XXI. Hanc rectè excipit V. S. in eundem finem instituta, quæ quædam vasa cerebri, sanguine copia & impetu peccante distenta, & alia comprimantia, depleantur, & sanguis a parte affecta revellatur, quod fit partim quia jam sic quodammodo in depletorum vasorum, sc. arteriarum, fibras motrices (quæ ante erant compressa & angustata) spiritus animales liberius influunt, sicque eas constringunt, & sanguinem movent & ad glandulas fluere sinunt, partim quia magis ad lectam partem affluit & sic minor copia adfertur ut dixi §. superiore.

§. XXII. Ne tamen aliqua remaneat menda, porro medicamentis convenientibus tentetur cura, qualia sunt aromatica, spirituosæ, volatilia, in seq. nominanda, ut & ipsa cardiaca secundi generis, pertinacia alias dicta, quippe quæ spiritus augent, non quidem eorum materiam, sed eos eliciunt & bonam secretionem excitant & diaphoresin cient: hæc enim pertinacia primo impetu sistunt fermentationem, ob duras, graves nec adeo flexiles particulas & mobiles, postea vero cum sanguini intime mixta sunt, fermentationem augent, quia poros sanguinis mutant, adeo ut materia æthereæ influens in sanguinem, eumque continuo, ut & omnia corpora pervadens & velocissime mota, poros sibi non inveniens, alios sibi formet, atque huic ob rationes §. XVI. dictas, augetur fermentatio: qua sic auctâ fermentatione & motu particulæ crassiores aliæque
noxæ,

noxia, illa in sese attritione dividuntur & ad habitum corporis aliaque excetoria delatae ablegantur, & particulae spirituosae aliis involutae extricantur & in tali ponuntur statu, ut commode in cerebro secerni possint, cui accedit hoc, quod motus sanguinis progressivus acceleratur. Quod ad volatilia, illa etiam motum sanguinis fermentativum & progressivum augent & diaphoresin excitant, pertinacibus mixta, & bonam sanguinis diathesin reddunt, qua tandem evadente bona, motus partis magis ac magis redit.

§. XXIII. Cætera res non naturales suppeditabunt, & monendum hoc de diætâ ipsam debere constare ex cibis, euechymis & eupeptis bonum sanguinem satisque spirituum suppeditantibus.

§. XXIV. Verum & alium casum quæ a colluvie serosa est, lustrare proposui; quæ etiam multum variat ratione serosæ materiæ, tenuioris vel crassioris, vel variarum particularum admixtarum, quod unicuique hunc curaturo recte perpendendum venit, ut & an sit a causa externa vel interna: sed licet in sanguinea V. S. apprime necessarium statui, atamen hoc in casu eam plane noxiam (licet non desint, qui contrarium & contendunt) assero, ratio est, quia hac major sanguini & spiritibus potest conciliari motus ad partem affectam velut in alio casu, quia magna sic est spirituum animalium penuria, qui sunt sanguinis motores, idque non solum in nervis sed & in toto sanguine, & materiæ serosæ in corpore abundantia, ut §. X. dixi, quæ se in tubulos vel ulterius in nervos demisit, atque hinc liquido constat sanguinis magna ex parte spiritibus orbi, motum V. S. hac accelerari non posse, aut majoris motus occasionem dari, sed quidem præberi ansa majoris obstructionis, quia pars sanguinis tenuior emittitur, & plures tantum spiritus disperduntur, & hinc cruditates, quæ omnium primo hic sunt debellandæ, augentur.

§. XXV. Posthabitâ ergo V. S. videndum quid hic valeant medicamenta idem præstantia. Hæc medicamenta. (de clysteribus loquor) ad humoris obstruentis revulsionem, excitationem vel dissipationem raro aliquid conferunt, quia ordinario nimis fixus est, adeoque his, ut medicinæ fiat locus & cruditates exulent, potius purgantia stricte dicta per os exhibita, substituemus, & quidem hydragoga & phlegmagoga fortiora junctis spirituosissimis plurimo sale volatili factis, ut spirituum damnum iis aliquo modo resarciatur & materia peccans præparetur. Pro-
purg. hic loci inservire possunt extr: cathol: trorch: alhand: galapp: scam: rhæum diathurbith: tant: vitriol: pilulæ cochia, de chamæpitide, facti-
da.

dæ. Hier: pic: merc: dulcis (cujus tamen usum cane pejus & angue vitet Medicus in iis qui ejus tractatione paralytici facti sunt) & s. Quorum hæc aut illa pro varietate humoris paralytici & patientis constitutione, pro Medici prudentis arbitrio, in subsidium vocari possunt, varietateque pro re nata elegantes concinnari formulæ, quibus ego non inhærebo in Generali hac dissertatiuncula, cum ratione circumstantiarum variari necessario debeant. Spirituosa & volatilia, de quibus mentio facta fuit, purgantibus addendas sint ol: roris marini, sassap: rutæ, lavend: succini, castor: ejusque tinctura & s. Quæ etiam variis in casibus variis purgantibus addi possunt. Si saburra pituitosa sit in ventriculo, vomitorium infusione croci, metallorum & s. confert.

§. XXVI. Evacuatio hoc modo corpore, recte confugimus ad ea quæ materiæ obstruentis discussionem promovent, & spiritibus ac cerebro robur addunt; quid per robur intelligatur vide § XII. Quæ illud præstant sicut salia volat: & aromatica, quæ simul diaphoresin excitant (maxima namque salutis spes in sudoribus movendis consistit) cui fini recte inserviunt quædam mixturæ apozematibus gratiores, quia morbus chronicus est & longæ ordinario durationis, quocirca patientes ordinario medicamentorum usum, præsertim ingratorum fastidiunt, atque sic omnem curæ animum abjiciunt, adeoque ut tristitia & desperatio, huic morbo summe infestæ, quia sic spiritus suffocantur, omnes Médico nervi intendendi sunt, ut graviora seligat medicamina, quæ morbo profligando simul idonea existant, ut eò pacto animus, quò ad ejus fieri potest, ad spem lætitiæque, huic affectui non parùm faventes, quia ita sp. sopiti exaltantur & exagitantur, disponatur. Primas inter has tenent aq. cæphalicæ, cardiacæ antiparalyticæ, antapoplasticæ, reginæ Hungariæ & s. Tinctura castorei, croci, elixir prop. sine acido, sp: salis armoniaci, fulig: urinæ, additis pertinacibus, ut bezoard: miner: antun: diaph: & s. ut & oleorum superiore § memoratorum aliquot gtt. Omni quoque hic laude digna sunt lavendula, ut & ejus aq: mentha ut & ol: ejus aq: melissæ nec non ejus oleum & aqua, chamepit: tanacetum ut & ejus aq: seu sp: qui penetrantissimus est. Hoc in casu optima quoque sunt apozemata, decoct: vulgò ex ligninis, dummodo eorum usus patientibus persuaderi possit, ut ligno guajaco, panacea, sassaf: sarsaparilla, additis herbis prædictis, ut rore marino, qui hic specificum audit &c. quibus pro re nata in colat: addi possunt, aq: memoratæ & olea & volatilia modo dicta, ut sp: tanaceti, aq: ceraforum nigrorum &c. ex quibus salutare formulæ fieri possunt. Interdum, si indicationes postulent

postulent purgantia, simillimum decoctorum colaturæ addi possunt & præfertim pulpæ colocynthidis.

§ XXVII. Hisce sudoriferis quandoque interponatur purgatio, ut materia cruda hoc modo præparata ex corpore evanescat; ne tamen modum excedat, atque hoc in casu optime dantur pill: de chamep: cujus descriptionem alibi videt, nam

Dulcius ex ipso fonte bibuntur aque.

Harum pilularum sumat vesperi patiens post levem cænam ʒj. quod pro indicatis duos vel tres dies continuos fieri potest.

§. XXVIII. Conducunt insuper linimenta, quibus nucha, nares & tempora illinantur, ut & sternutatoria ex sem: nigellæ, pipere albo, elleboro albo, majorana succo betæ, pulegii nicotiano &c.

§. XXIX. Verum quia hunc morbum difficilis curæ pronuntiavimus, præter interna etiam externis curâ tentetur, ut sic agant vi unitâ, quæ fortior est. In quorum applicatione cautela est adhibenda, nim: ut attendatur, priusquam applicentur, ubi locorum latitet obstructio, an in spina, an in nervi principio, medio, an fine, an in ipsius musculi initio an fine, ut tunc ibi apponi possint topica. Inter hæc laudantur fofus, inunctiones, emplastra, frictiones pannis asperis & calidis immersis VR, vel V camphorato, frictiones manu calida si a frigore sit, sæpe multum præstant. Caveatur ab oleosis & pinguibus, quæ poros obstruere valent, verum sint penetrantia, ut aq: ex dictis herbis destillatæ, sal volat. ingentes quoque vires secreti aluminis Felicis Wurstii, ejusque lixivium: egregium quoque est unguentum nervinum, paralyticum Mynsichti & galbanetum Hortmanni, conducit & ol: philosoph: Inter adipēs, optimum est humanum & ejus oleum, cui addi potest cranium humanum calcinatum, emollientia si adhibenda sint, valdè sint pauca. Non infimæ laudis quoque sunt balnea, thermæ naturales seu artificiales ex herbis dictis, utpote penetrantissimis.

§. XXX. Ast priusquam vela contraham, dicendum aliquid de diætâ restat, cùm permagni ejus inter sit; si enim non rectè ea instituat, patiens sæpè causâ cadit, atque semet ipsum & Medicum frustratur, neque adeò ut nec hic, nec ille, optatum finem (puta sanitatem) videat, mirum, ex inconveniente namque diætâ non congruus potest fieri chylus, atque hinc nec sanguis, nec spiritus sinceri generari, quod tamen intendit Medicus, & quantum medicamenti vincitur, tantum, (quid ni dicam plus?) hoc errore perditur, atque sic curæ remora fit, quæ, si ullibi noxia sit, saltem hic est, &, ne malum per longas invalescat moras, est

est arcenda. Instituatur ergò diæta tenuis & siccans, id est, tenuium partium & non multùm viscosarum, quæ facilis sunt digestionis, & boni succi, aromaticis, vel aromatibus conditis, ut sunt juscula carniū annosarum, quævis spirituosa & aromatica, additis aromatibus mace, nuce mosch: pipere integro, vel ovis sorbilibus, carnibus assatis, salviâ, & roremarinô transfixis, brodis ex V. Rhenano & aq. p. æq. additis caryoph: cinnam: croc: mace, nuce mosch: ovo con-
quassatò, &c.

§.XXXI. Potum quod spectat, vino assuetis nequaquam id est dene-
gandum, pro potu ordinario valdè decantatur ros marinus, qui s. a.
decoctus, in aq. communi bibitur, laudatur insuper cerevisia medicata
ex betonica, melissa, mentha, farsaparylla, guajaco. Sed manum de
tabula.

COROLLARIA.

I.

*V. S. in variolis planè noxiam censemus, nisi, datò pecu-
liari casu, qui eam indicet.*

II.

Fluxum sanguinis mēstrui tantum accidentalem.

III.

*Adeoque eum non qualitate vitiosa, sed quantitate pecca-
re. aff.*

IV.

Febris causam, non acidum in pancreate secretum.

V.

*Sed particulas sanguinis integrantes, quæ secessionem fece-
runt, qualescunque demum sint. Aff.*

VI.

*Quaproptèr non danda esse in paroxysmo vel circa eum medi-
camenta vehementia, quæ secessionem illam, nimiam fa-
ciunt & nimiam sanguinis dissolutionem inferunt, ut vo-
mit. purg. &c. nec etiam talia, quæ omnem fermentatio-
nem sistunt & noxiarum expulsionem prohibent, sed ta-
lia, quæ leniter secessionem promovent, & noxias illas
particulas expellunt, ut sudorifera leniora. Aff.*